

文登縣志卷一上

建置沿革

唐虞青州萊夷地禹貢萊夷作牧是也

舊志引堯典分命羲仲宅嵎夷曰暘谷又以縣西之暘里店即古暘谷堯命羲仲賓日處殊屬附會孔安國書傳東表之地稱嵎夷正義曰青州在東界外之畔爲表堯時青州越海而有遼東樂浪三韓之地後漢書東夷傳曰宅是嵎夷曰乃暘谷指今朝鮮言禹貢雖指據後漢書以嵎夷爲朝鮮地蓋朝鮮古屬青州與今登州之東境隔海相對正合孔傳東表之語非文登地也齊乘以甯海州爲嵎夷亦誤

夏商青州地

舊志青州之域後爲斟灌斟鄩氏封國考左傳使澆用師滅斟灌及斟鄩氏杜注壽光東北有灌亭續山東考古錄斟灌國故城在壽光東北四十里今爲斟灌店斟鄩杜注北海平壽縣東南有斟亭平壽即今濰縣斟灌斟鄩在今壽光濰縣境內確有明證舊志緣府志之誤率爾採入殊爲無稽

周青州地萊國東境不夜城卽此

齊地記云古有日夜出見於東萊故萊子立此城名曰不夜故城在縣東北八十里今入榮成縣 舊志云周爲牟子國地據山東考古錄春秋以牟名國與地者有三皆不在登州境內路史齊忌牟偏近臨淄

文登縣志

卷一上

建置沿革

一

乃遷牟於東海牟子國在今福山牟城社惟牟國原在今之萊蕪縣何時東遷諸書無考春秋襄公六年齊侯滅萊萊共公奔棠則遷牟當在滅萊後矣自牟以東別無國邑文登或其屬地也

秦齊郡睡縣地

史記秦始皇使天下飛芻輓粟起於黃腴元利志黃卽黃腴睡卽文登縣又史記秦始皇二十八年行郡縣乃並渤海以東過黃腴穿成山十道志文登漢睡縣有之罘山此據唐初言之福山亦文登地自福山以東皆睡矣方輿紀要睡城在文登西七十里或曰秦所置此沿寰宇記諸書傳刻脫去百字遂誤至今考寰宇記睡縣在文登西七十里清泮水側近與海畔之罘山相對是爲今之福山縣而云縣西七十里其爲脫去百字明矣但秦之睡東極於海漢之睡則今福山縣耳

漢置昌陽不夜二縣屬東萊郡

續山東考古錄昌陽縣故城在今縣西南三十里後漢書光武十王傳章懷注昌陽故城在今文登縣西南寰宇記萊陽縣前昌陽縣理在文登縣西南三十里昌陽故城是也又文登縣昌山宋永初山川記昌陽縣有昌山又云昌陽湯在縣西南四十里九域志文登有昌陽水是漢縣以文登之昌山昌水得名故城在文登明文如是

按縣之昌陽山東通志考之甚詳後惟續考古錄力爲證驗始知近志之誤惟其引齊乘昌山爲昌水所出則仍混入萊陽文登昌水不出於昌山又謂今縣西南有古橋河東南流入母豬河卽黑水昌陽城當在古橋河昌山之東今考縣西南三十里昌陽故城基址猶存土人訛爲康王城卽漢舊縣晉惠帝元康八年始移於今萊陽縣 又按晉書地理志無昌陽縣宋書州郡志昌陽令元康八年分長

廣縣立則今之萊陽縣也新登州志只知萊陽爲昌陽不知漢縣所在又不敢背寰宇記之文而移文登治所以遷就之云文登城當在今甯海西南海陽西北至唐麟德二年移而之東考文登建縣自北齊至今未移治所歷代地志諸書俱在府志不察而謬爲臆說武斷極矣

東漢昌陽縣省不夜入之屬東萊郡

舊志東漢省不夜入牟平縣考文登縣之西爲東漢東牟縣卽今甯海州又西爲牟平縣則今福山縣是越東牟而省不夜入牟平斷無此理寰宇記今縣東北八十里有不夜故城後漢省併昌陽是也

魏昌陽縣屬長廣郡

晉省昌陽入長廣惠帝元康八年復置於長廣地在今萊陽縣界今縣

爲昌陽縣地牟平縣地

劉宋昌陽縣地牟平縣地

昌陽縣治在萊陽牟平縣治在福山蓋晉省東牟入牟平縣文登之南境屬昌陽北境屬牟平也

後魏觀陽縣地牟平縣地

文登縣志

卷一上

建置沿革

二

觀陽縣治在今海陽縣魏書地形志觀陽有昌城卽漢之昌陽城有馬賓山卽今縣西南之馬鞍山有牛耳山卽今縣東南之牛仙山蓋後魏復析昌陽置觀陽縣東極於海故今縣之南境爲觀陽縣地牟平縣治仍在福山魏志牟平有之罘成山之罘在西成山在東則縣之北境屬牟平明矣

高齊天保七年析牟平觀陽地置文登縣

卽今縣治

屬光州長廣郡周因之

寰宇記取縣界文登山爲名文登山在縣東一里

元和志謂在西北九十里縣所得名疑有誤

按文登置縣元和志以爲高齊後帝分牟平縣置寰宇記齊乘一統志俱謂天統四年置惟方輿紀要謂爲天保七年置北齊書無地理志考後帝紀天統四年無更置郡縣之文惟文宣帝紀天保七年詔曰要荒之所舊多浮僞百室之邑便立州名三戶之民空張郡目於是併省三州一百五十三郡五百八十九縣三鎮二十六戍文登置縣當在是年蓋省併牟平觀陽而置文登以方輿紀要爲是

隋文登縣屬東萊郡

隋書地理志文登縣後齊置有

石橋有文登山斥山之罘山

按隋承齊周之舊東盡成山西有腫縣東牟觀陽之地疆宇甚廣故唐初析置廓定清陽觀陽諸縣皆故文登地也

唐文登縣屬河南道登州五代因之

新唐書地理志武德四年於縣置登州以東萊郡之觀陽隸之六年析置清陽
廓定二縣舊唐書地理志貞觀元年登州及清陽廓定二縣並廢地入文登縣

按唐初於縣置登州亦曰文登郡見十道志清陽即今福山縣廓定縣地志諸書不載當爲今之
甯海州麟德二年改置牟平縣如意元年於牟平置登州神龍三年移登州治蓬萊縣文登屬焉

宋文登縣屬京東東路

登州東牟郡

金文登縣屬山東東路甯海州

元文登縣屬直隸都省山東甯海州

明文登縣屬山東布政司登州府甯海州

洪武三十一年於縣北九十里置威海衛東百二十里置成山衛南百一十里
置靖海衛成化中置百尺崖所屬威海衛濰山所屬成山衛甯津所屬靖海衛

國朝因之雍正十三年析成山衛置榮成縣威海靖二衛併入縣屬山東
省登州府

按 欽定皇輿表康熙間甯海州猶領文登一縣縣屬登州舊志不載改於何時疑在雍正十三年裁
併衛所時也俟考河東總督王士俊疏稱文登幅員已極遼闊今再加以威海靖海成山三衛地糧軍

文登縣志

卷一上

建置沿革

三

戶其地周環至八百餘里殊難管轄而成山衛又未便聽其孤懸海濱且成山地方爲海洋東面險要
之區則成山衛自應改設一縣以資彈壓東以成山頭海邊爲界西以文登縣橋頭集爲界南自靖海
衛之甯津所海邊起至西南文登縣屬之柳樹村爲界西北以文登縣之周家村爲界分撥文登縣之
朝陽都十一里溫泉都之橋頭等七里雲光都之柳樹村等二里地畝錢糧併靖海衛之寧津所密南
泊維軍草埠元正寨等屯俱歸改
縣征收等因 題請奉 旨俞允

今縣境東西廣一百二十里南北袤二百里 東至榮成縣界六十里

西至甯海州界六十里 南至海一百十里 北至海九十里 東

南至榮成縣界一百里 西南至甯海州界六十里 東北至榮成縣

界六十里 西北至甯海州界五十五里 至登州府三百二十里至

濟南省會一千二百五十里至順天府二千二百里縣城在赤道北三

十六度十三分南界靖海在赤道北三十六度三十二分起東北界威

海在赤道北三十七度三十六分止東界東五度四分西界東四度二

十八分

舊志星野云縣入危九度考晉書天文志東萊郡入危九度東萊領縣十七一邑而占一度說本難通況二十八宿割屬九州以天合地理涉元渺前人已多異議今測赤道度數以邑境爲準不用前人分野之說附天文於地輿劉昭補注漢書例也

附雍正十三年以前文登縣舊界 西北接甯海州界自本縣鳴里店起十里至板橋村又十里至三十里鋪又十五里至胡家莊又十三里至柳林村又二里至文登縣又十里至文登營又二十里至五岔口又二十里至報信店又二十里至橋頭集鋪又十五里至溫泉寨又五里至蒲柳村又二十里至黃埠村皆屬文登管內 自黃埠村五里至成山衛又三十五里至海爲成山衛界 本縣南至老軍屯接靖海衛界自屯至衛五里北至接官亭接威海衛界自亭至衛八里以上舊界見 欽定皇輿全覽東西一百八十里南北二百里

形勢

鐵槎積翠層霄仰貫斗之形玉海環滄夾岸控朝宗之勢

山東通志

憑負山海東陲奧區

輿圖摘要

自唐宋金元以來縣之舊境西阻崑崙南北東三面距海爲山左邊陲古稱天盡頭明時建立三衛備禦海防縣城居中三衛環列如星羅碁布形勢完固自分設榮成縣東鄙單弱如斷左臂

文登縣志

卷一上

形勢 山川

四

山川

禹貢以山川定九州疆界秦漢建置屢更而不敢失山川之限故州郡有易置而山川則萬古不變者也善乎于欽之言曰自圖經散佚齊地山川例蒙俗惡之稱况邑僻處東陲古籍既失流俗相沿自明以來修志者不能據地志諸書以正其訛以致境內山川半多舛誤今本各史地志並元利志實字記齊乘諸書所載者復其舊名而海疆島嶼池沼溫泉以類附記焉

秦山之脈東行者蒼於棲霞之艾山由艾山東北至鐸山折而北爲鵲山又折而東北至鷹嘴石爲甯海州又折而東峯巒疊疊望之若旂旗若榮戟若奔馬游龍青黛一色南北綿亘二百里外障東海內蔽三齊是爲崑崙山文登在山之東萬峯巒岼皆以崑崙爲祖由崑崙而東北爲陽里口又東北爲愛山由愛山而東北爲奈古山舊威海衛在其下自愛山而東南爲著棋山自著棋西南行者盡於丰山文登縣在其下著棋山南出爲駕山駕山東北入榮成縣盡於成山頭駕山西南行爲

萬壽山又南爲鵠鵠山又西爲雙頂山又西爲娘娘頂折而南爲岱山爲柘陽山又西南爲鳳臺頂盡於五壘島自萬壽山而西爲架子山爲廟山又西爲萬石山又西盡於馬山古之馬賓山也由廟山西南爲摩天頂又西南爲昌山漢神龍祠在山上山之陽爲漢昌陽縣以昌山得名故址猶存又西爲九頂埠又西南盡於姚山頭木渚河入海處也由駕山而東南爲李家山牛仙山鄒山又南爲石門山蓬萊山又南爲黃華山又南爲望港山又南爲黃山又東南爲斥山折而西盡於鐵槎山奇峯九頂黛色參天南連大海西有故靖海衛由崑崙而西南爲紫金山又南爲崑山折而西爲虎窠山在木渚河南岸北與姚山頭相對束水東流天然門戶此邑中諸山大勢也其分隸榮成者詳榮成志

文登縣志

卷一上

山川

五

陽谷小識曰邑處萬山中而以崑崙山爲西北維著棋山爲東北維斥山爲東南維崑崙山爲西南維

王志有鐵官山在縣西七十里新登州志在縣西一百四十里考一統志鐵官山在甯海州西南四十里漢鐵官鑄冶處舊志失考今不載又舊志崑崙山召石山今入榮成

崑崙山在城西六十里一名根余十六國春秋石勒遣石虎擊青州刺史曹嶷嶷議欲徙海中保根余山卽此一名姑餘仙經云麻姑於此修道上昇餘址猶存因名姑餘蓋根余姑餘崑崙以聲相近而轉其最高者名大白頂一石大悲頂甯文於此分界山之西面距甯海境東一面入文登實爲甯文鎮山明代以前老樹參天人迹罕到獸有鹿豕禽有子規 國初以來生齒日衆山木伐盡樵蘇可通山中雲烟綺縠冰雪琢鏤四時幽絕迴異人間羽客道流往往棲止世所傳王真人及麻姑

上昇遺址多在甯海界

江都吳肇煌遊姑餘山詩二首

聞說姑餘勝同遊物外身雲中穿徑客天半上山人路僻犬聲急林深鳥語頻征衣沾雨濕到此拂清塵
四望崎嶇路烟光逼眼迷橋危人不度風急馬頻嘶翠色峰千仞清流水滿溪登臨心共適身與碧雲齊
桐城方根本暮春遊姑餘山詩二首

一室開幽處僧廊夜坐閒案留千頃月窗納四圍山所得烟霞外安知人世間林風動清聽萬響落松關
選石坐清曉登臨思不窮鳥喧深澗裏人影亂流中風漱水聲急烟浮山氣空崑崙佳勝地清興更誰同
南昌熊學煜遊崑崙山詩

靜室聯吟客悠然心境間有時惟聽水無處不看山人坐翠微裏窗開綠嶼間夜深移燭盡涼月到禪關
知縣王一夔遊姑餘山詩二首

石磴躡層觀森森萬木陰晦明幽壑態去住白雲心寂寂壺天迴悠悠蓬海深麻姑不可接證果向誰尋
古樹插青霄盤根歲月牢階前留蔭閣殿角拂雲高夜雨鳴天籟晨風聽海濤斯遊當潯暑選石坐揮毫
邑人林鍾岱曉經崑崙山詩

合沓羣峯亂春雲向曉生無從尋鳥道何處問人行霞暖桃初綻山空澗自鳴策驢三十里猶未辨陰晴
邑人呂肇齡遊姑餘山詩二首

擬買青山住蕭蕭策杖行到來塵慮滌直覺道心清洞古雲張蓋花開鳥喚名寂寥人境外風動閣鈴聲
勝地元幽絕徘徊薄暮時晚煙迷大壑殘照入清池山靜鐘鳴遠林深月上遲奚奴引歸路筋力不知疲
呂肇齡再遊姑餘山詩

看山比讀書知新在溫故舊遊十年前猶記登臨路迂磴霜華濡風吟紅葉樹懸溜下層崖吼如奔雷怒

文登縣志

卷一上

山川

六

微徑一以折巖深谷盤互迤邐造禪宮鐘梵雲中度仙洞豁豁訶訶峭石屹森布遙遙望海亭溟濛積烟霧
天高萬象殊地迴百靈赴心神所應接塵夢恍已寤昔來何草草今茲領異趣乃知探奇者名山屢振步
君看蘇子瞻前後赤壁賦

邑人于熙學西山詩二首

峯環澗復歷紆徐七十二庵隱者居見說此山三百里崑崙或恐是根余
搔首青山宿霧殘西風吹徹海濤寬直從初日蒼涼外獨上峯頭萬里看

于熙學憶崑崙詩

登萊神仙窟塵土淨如掃豈惟天宇清山川景亦好而况大崑崙春秋饒芳草自從七真來無人蘊文藻
朝朝樂鹿間日日煙雲老荒涼神清觀寂寞安期棗我昔曾周覽杖屨香滿道水光染山青松櫪皆十抱
至今猶入夢何時更探討洞口問蓮花峯頂望蓬島因之二勞遊采詩可參考沈吟身漸衰茫鞋著難保

紫金山在城西五十里金大定壬寅馬丹陽過而喜之曰此洞天福地
名勝處也建東華宮於山前元大德壬寅李道元開石洞曰朝陽洞山
之西北五六里兩石屹立高三四丈狀如新月俗名月芽石隨石之凹
凸刻道德經文錯綜成行大抵金元諸真人所爲一統志紫金山一名
崑崙高出天半俯瞰大海有泉曰靈源泉山之後爲九龍池入甯海界

詳見州志

邑人呂潤芬夜登紫金峰詩

落日千峯夕蒼茫晦遠村深林呼野鶴遠火點秋原風力當松壯山形入夜尊劃然動長嘯彷彿是蘇門

邑人于觀貞雨後遊紫金峰詩

紫金峰下訪全眞曲轉蘿坡少四鄰策杖頻懷招隱願披榛忽結看山因雨餘屐踏苔雲破洞口泉梳石

髮新仰羨五華碑字

古攀登獅座更揮塵

撇簪山在城西南三十里單椒獨起峭削秀拔上有靈泉有碧霞元君廟東爲亭四顧蒼然山海繡錯賽神者先以靈泉盥手漱口而後入廟以示誠敬舊俗也啓堂隨筆文登西南有山突出兩大河夾之蒼翠聳秀崔巍嵯峨土人以撇簪名余以字音測之必是特秀曰撇簪者聲之轉耳

邑人林丕欽登撇簪山絕頂詩

曾聞海客說三山鰲背負來青插天陸沈誰知幾今古滄海倏忽變桑田萬派朝宗東南去瞻此奇峯始

文登縣志

卷一上

山川

七

何年孤撐直爲天作柱峭拔如同華嶽蓮古廟丹青雜鬼怪鸞翔鳳翥參羣仙天門高步觀瀛海鐵槎咫尺九頂回北顧崑崙嵐朝萬笏龍池噴雪落檐前倚據星宿霄漢上雲霞繞膝珠斗懸回頭下視塵寰小只因身在日之邊

愛山在城北七十里秦山廟其下有洞曰愛山洞見寺觀

今作艾明碑作愛

老雨頂俗呼玉皇頂在城東北五十里上有石廟明宏治十七年建崇禎元年康熙二十四年重修旱澇祈禱無不靈應山極高峻登其巔則見三面海水際天崑崙崑崙峙其西南著棋對於東南四山合抱羣峯皆小鄉進士叢雲燦碑云茲山蓋高爲我境內第一峯歲在辛卯鄉之善信士琢石爲尊飾以金碧爲禱雨處也

轉龍山在城北二十二里古名磨兒山由東迤西盤曲五六里如神龍宛轉故改名東有大石險怪如臥虎俗呼爲老虎窠下有二洞一東南

向一西南向天然相對深藏不測東一洞上有古篆數字剝蝕不可辨山之西舊有石廟村人禱雨祈晴及染病而禳者無不應遂共議陶瓦增椽爲廟落成之後適天陰雨忽一人自外至衣雖藍縷氣象異常問其姓名不作一語拾香鑪中餘燼畫字於牆云轉龍山八景畫畢卽去咸以爲仙

著棋山在城東北五十里俗名正棋山由崑崙而東以此山爲巨鎮頂有玉皇廟廟西有石枰方丈許色深翠界畫天然墨色深入石髓兩旁坐窠天成無斧鑿痕相傳爲仙人著棋處棋枰之西有自來碑聳立石壁高七尺廣三尺餘厚近尺無建鑿之迹可尋碑之中行四大字曰洞天府地兩旁及碑後小字有乾坤日月地天泰有生不爽等字餘多模

糊山之東北有白鵝石突然而出光潔可鑑遙望之如白玉琢成石之東有地泉一名地河深藏山腹尋之不見但聞水聲潺潺山下有洞名水洞洞門闊容數人漸入而路漸隘僅可容身碧水澄澈其深無底緣水岸石齒側足僂行旣入又闊如是者三則石壁雲蒸路暗水隔不可復入相傳其下通北海云又有朝陽洞火石洞和尚洞皆幽邃山石中碑材色碧而質堅邑中古碑數千年不剝者皆此山石也山之西曰蜂山山隙時有蜜蜂出入故名

榮成歲貢韓士仁自來碑詩

著棋山上自來碑棋盤石西路之隈孤嶂聳立臨絕壑峭石生根何折摧借問土人幾多載百歲老人如童孩洞天府地無缺畫遒勁與曲古體該乾坤日月地天泰有生不爽無疑猜其餘模糊不可識搜折枯棘剔莓苔殘畫欲讀不可讀蛟龍怒鬬忽離開掬土拭之拂以袖極窮目力不矜哀最後張國獨古邁一字費盡數徘徊佶曲聲牙語不貫重重石髮字多埋獨立山頭長太息恐是飛來峯飛來

白鹿山在城北四十里寰宇記唐神龍三年刺史畢元愷獲白鹿於此燒車嶺在城北三十里

幞頭山在著棋山西十里許以形得名又城西十二里有幞頭山山石突出形似幞頭其下爲幞頭村

駕山在城東北三十里傳爲秦始皇駐蹕處其北爲天門澗南爲駕山寺古名清涼寺

天福山在駕山東南隅四面奇峯環抱中有地寬廠圍五里許突起平臺國初大水泊于氏建佛刹其上院宇幽邃竹樹陰森士人往往讀書於此臺之左有甘泉繞臺流涓涓不絕每當春夏之際樹林翳影雜鳥弄聲極爲幽勝

文登縣志

卷一上

山川

九

萬壽山在城東二十里山陽有古嘉會院今名洪教寺

六山在城東五十五里六頂相連故名有六山寺

邑人于熙學夢遊六山詩

萬里誰能汗漫遊依然身醉六山秋寺門靜對公孫竹村笛遙呼子母牛領客尋花懸麈尾看僧掃壁待蠶頭題詩未竟鄰雞動夢斷空齋古錦收

三奇山在城東二十里上有龍穴石竈仙人迹因以三奇爲名林壑幽邃神仙窟宅也

鵠鷗山在城東南二十里寰宇記此山常有鵠鷗棲止故名今名金嶺山又名佛爺頂石上蠣殼紛如或云舊時南連大海故孕此今山去海二十餘里

廢鐸鑿曰縣治南長山一帶雅似外屏其東南二十里有山高出羣峰勢如建瓴山巔之上其平若砥礪以周垣中建佛殿俗名佛爺頂因廟得名也山之周遭大小村落著布星羅或橫掛山腰或潛伏淵底土

田無多類皆膏腴草木喬衣食充足不廢絃歌諸生明經絡繹不絕科目則數十年而一見不可謂非山川靈秀之氣之所鍾也

柘陽山在城南四十里明時昌山神龍移祀於此有龍王廟山橫亘數里其南有古寺曰柘陽院峯巒合抱規模宏敞廟之西又有小殿三楹謂之西院逼處山阿石骨嶙峋殿後石洞中常有巨蟒潛伏天將雨輒效雞鳴時出遊人或見之不避人亦不爲害乾隆三十年蟒去不知所

之柘古碑作遮

邑人賽珠遊柘陽山詩

山勢屢屢盤海曲遊人一步一蹣跚我從崑崙山下來猶貪山色入山腹千載空傳柘陽名到今不見柘陽木惟有鬱鬱萬松林亂峰高下迎人綠巋然古寺藏巖底碧瓦參差雜茅屋入門突兀摩雙碑苔蘚斑駁不可讀金皇統元至正達魯花赤字髣髴老僧延客關深堂隨意起坐無拘束西行更上老龍宮畫壁森羅紛水族馮夷擊鼓鼉舞指點丹青看不足我生性癖酷愛山老樵牧童喜追逐竭來茲遊真奇絕幾時踏徧海山麓拾紫芝調白鹿蓑衣簞笠愜幽獨

五壘山在城南五十里山下卽五壘島海口寰宇記其山南北成行入

文登縣志

卷一上

山川

十一

海如壘焉

廟山在城南十里北對縣城爲城南屏幃其西爲摩天頂

萬石山在城西南十里下有石屋明嘉靖間邑人叢磐講學於此巖畔有萬石山三大字方廣丈餘磐所鐫也萬石山五箇頂本是一山其東峯稍大曰五箇頂其西峯差小曰萬石山

名勝志萬石山上五頂相連尖峰峭削俗名五個頂此大誤五個頂別自爲山不在萬石山上

江都吳肇煌萬石山詩

萬石巔巘曲徑通登臨身到白雲中千層松葉晴嵐翠數似楓林夕照紅秋草晚連孤嶂遠飛泉響落半山空攀援更上丹峰頂天海蒼茫望不窮

邑人于觀貞初春自縣城訪萬石山紀遊詩

我聞萬石高巖巖礪礪嵌綴標雲揭今朝訪春指城南逶迤十里山相銜澗草初舒林藥捲穀雨已屆風未輟袂單隨步錯復參扞者躍者兩兩三三坐憩橫岡畔纔展行穿坳澗展旋轉轉東環鎖嶺如函陡撐北角青巉巖倒仄蹲態仆壓虎尖削連似揮神斧何年龜骨蛻成邱寶空碕疊奔星稠轉猜金踊洪鑪熱天匠踏傾瀦頭鐵西南一峰關亦奇半壁峭鑿創閣基祇今大士趺盤住傳卽少保兀誦處鐫崖三字懸書空阿誰還逞椽筆雄竭來弔古苦生晚尋山有興命途蹇杜鵬藏苞還放花應怕催歸觸念家詎知垂老

無家絆正好
棲霞愜巖觀

馬鞍山俗名馬山在城西南十里中多石洞今塞魏書地形志觀陽縣有馬賓山即此北魏縣之南境隸觀陽故以馬賓牛耳諸山定疆界山產繭最良土人名曰馬山繭

昌山俗名回龍山金史地理志文登縣有昌山一統志作昌陽山山南有漢昌陽

縣城遺址一統志昌陽山在文登西南十里上脫三字一名巨神山或作巨神島在城西南三十里山有巨神龍自

漢已著靈異建祠山上寰宇記引宋永初山川記云郡國志昌陽縣有

巨神龍有祠能興雲雨崔炎避黃巾賊於此山昌山之南濱海故亦可謂之島隋書地理志昌陽縣有巨神山考隋

之昌陽縣在今萊陽縣東南二十五里乃晉元康八年自文登徙此亦在昌山之陽有昌山無巨神山隋史蓋緣漢志之文未加詳考故以文登之山誤注於昌陽縣下齊乘昌山在文

登縣西有三十里有巨神龍龍祠坊本齊乘作巨神島蓋傳刻之訛欽定皇輿全覽引齊乘此條作巨神龍登州舊志引齊乘亦作龍字

文登縣志 卷一上 山川

十一

自明以來昌山之名亡昌山神龍亦失所在遂移祀神龍於縣南四十

里柘陽山此即今俗所稱禿尾李龍王也修志者不考古籍鄉里相傳遂多異說康熙五十三年龍見於宋村之北山

即昌山山名既失山南有宋村集土人名曰宋村北山一時闔邑闐闐立廟山巔改名曰回龍山此昌山改名回龍之始見

邑人賽珠詩注自是又移祀神龍於昌山每歲三月初二日俗傳為龍母誕辰妝

演雜劇為龍母上壽香火之盛甲於東方道光二十八年山東巡撫徐

奏請 敕加神龍封號奉 旨封溥惠佑民四字神龍遂列祀典

按宋永初山川記所引郡國志蓋晉司馬彪郡國志劉宋時其文猶存也今永初山川記已佚幸寰宇記載之齊乘亦本寰宇記而坊本多誤龍字作島昌陽故城在縣西南三十里亦見寰宇記昌山在故城之北神龍漢祠久廢今祠則始於甲午數千年靈迹頓還其舊賴宋元地志諸書在耳 寰宇記海牛島引郡國志之文按水經注有司馬彪郡國志今亦不傳

王志縣南柘陽山有龍母廟相傳山下郭姓妻汲水河厓感而有娠三年不產忽一夜雷雨大作電光繞室孕雖免無兒胞之形後每夜有物就乳狀如巨蛇攀梁上有鱗角怪之以告郭郭候其復來飛刃擊之騰躍而去似中其尾後其妻死葬山下一日雲霧四塞鄉人遙望一龍旋繞山頂及晴見冢移山上土高數尺人以爲神龍遷葬云後禿尾龍見年即豐每見雲霧畢集土人習而知之因構祠祀之歐志同惟改

郭作
李耳

按 欽定皇輿全覽引康熙舊志此條亦作郭姓妻與王志同歐志又改爲李姓妻郭氏忽郭忽李然則神龍之姓無定矣其實二志皆無確證各據一時俗說採以入志久之遂成故實其所以稱此二姓者亦有故焉自明移祀神龍於柘陽山山之後多郭姓山之前多李姓也又縣之南境回龍山柘陽山蓬萊山棋盤山等處皆有龍母墓然則墓亦無定矣總之深山大澤實生龍蛇以人生龍於古未聞龍有姓有父有母其母又有墓墓又不一處姓又不一氏皆有明以來里俗之談宋元以前地志諸書俱在無其說也

鐵槎山房見聞錄叢少保蘭初通籍時曾爲貴溪令嘗於張真人處遇同鄉李龍神曾求公向真人緩頰欲回家視其母公爲代請真人曰此非不可但宜遵海濱而行免傷禾稼耳忽霹靂一聲龍神已不見矣後公每暑日徒行頂上必有烏雲一塊相覆即神龍之報也按此亦採俗說以入稗乘神龍愈幻怪矣考明史叢蘭傳蘭登宏治庚戌進士即授戶科給事中終其身未嘗官貴溪縣令其說之荒渺不辨而明矣自明以來神龍之說愈傳愈謬故王志入於怪異歐志列於雜聞皆不合書莫古於周易之乾卦聖人取象於潛龍見龍蓋陽剛之德能興雲雨利萬物與大人同符龍自不怪傳者怪耳今復昌山之舊名溯神龍之故迹本宋元之遺書而正以 國朝之封號古籍 朝章炳燿千古舊志諸說存而不論可也

邑人賽珠龍母宮吟呈邑明府王公

柘陽山頂龍母宮下瞰萬井上撐空龍母宮畔龍母墓樵採不入松楸路當年龍母產龍子崢嶸頭角禿厥尾磨牙攫爪騰空去朝泛清江暮黑水異物不忘母氏恩竭來歸葬巖谷裏風姨執紼鼉鼉贈水晶珊瑚來海底至今膜咽走千村珠宮貝闕山頭起曾無碑碣鐫年代土人荒唐呼老李祈晴禱雨劇有靈龍

文登縣志

卷一上

山川

十二

兮歸來禾黍登聞說老僧小不謹轟雷掣電一時迸邇來一去不知還前年移向回龍山雕甍螭石窮民力更築龍宮關荆棘廟貌巍峩總一般喜新厭故理或然但是年年收玉粒不惜處處拋金錢卻怪今秋大雨雹震霖連旬失望朔稻子熟時未上場狂飈哮吼奔如削可憐野哭滿溝塍拜上龍宮知未曾咄哉愚鹵真難曉轉悔山場事不了明府王公智以廉洞察民隱知神好願上此詩到公府傳諭千家曉萬戶更假明威呼孟勞鑿斷靈根開響磬

龍歸大海不回首自今以始歲其有

康熙甲午移祀神龍於昌山重起祠廟改名回龍

山卽此詩中注語存此以備掌故使後世有考焉

娘娘頂在城東南二十五里山極高峻頂上有文峯塔建置無考洪武間重修嘉慶戊寅夏雨連旬塔復頽廢道光己酉重修南海行船者視以爲準也山腰有馬蹄石石上仙人行迹宛然其西有古洞甚幽邃山下爲顧家村村南山亦有塔村西卽白佛寺寺南爲岱山有塔與文峯同

鄒山在城東南四十里東與牛仙山連山極高峻鳥道崎嶇攀緣可上

三面海濤奔赴眼底山南有鄒山庵山西有廩生于選墓卽孝子于令
芬廬墓處墓西北有石方正如几舊名馬臺石孝子改名方石晚年自
號方石老人

牛仙山在城東南五十里卽魏書地形志之牛耳山後改名平山舊志
無名真人結庵於此乘牛得仙鄉人稱爲牛仙因改爲牛仙山唐順之
左編王玉陽初居牛仙山卽此

石門山在城東南五十里寰宇記山有二石聳立高二丈東西相去一
丈望之如門卽此廢鐸嚙曰邑東南有兩石突出平地高各三尋銳端
南曲遙望雅似羊角迫而觀之北向作獅子形邑乘所謂石門山也土
人名之曰雙石周遭地勢平衍六村環繞皆名雙石因石得名也

文登縣志

卷一上

山川

十三

蓬萊山在城東南五十五里有龍王廟

望漿山在城東南七十里山下有望漿寺古刹也

黃華山在城東南五十五里古黃華關也有黃華廟其西卽千八港

塔兒山在城東南七十里一石突出形狀如塔故名今仆

廢鐸嚙曰余村東南十餘里有山曰塔兒形勢不甚高廣河經其陰東入於海土爲水齧遂爾壁立山之
上石骨嶙峋悉出地上中有高石直矗上圓下方雅似浮圖曰塔兒山者因石得名也河廣不過數尺北
岸則平沙無垠幾近里許每秋水暴漲山下深可滅頂其餘不過及肩南岸則沒脛而已河之北岸有村
曰塔兒山亦因山命名也其村雖臨大河絕不爲害村有數戶類皆素封有某翁者思築室以廣其居乃
糾合村人共取山石有長於風鑑者止之曰河伏山下從未泛濫以石塔故若毀石塔恐河徙無常矣不
聽鳩工劈石塔隋之仆毀以築室未幾河流北注岸當其衝遂成峭壁高逾尋丈水至岸崩村舍半淪於
河於是北徙其居而河流則屈曲如蚓南北衝突毀良田無算河水去村不過數武而村亦貧不能支夫
天地生物各有其用剛愎者任意毀敗卒至身罹其災悔亦無及若此村者可爲殷鑒矣

斥山在城東南一百里跨文榮兩縣界亦作赤金元爲鎮設斥山寨巡
檢於此邑中于氏昔家焉故曰斥山于

齊乘爾雅云東北之美有斥山之文皮焉蓋以海濱廣斥得名高門之族居此有千餘家東齊于氏皆斥山望也欽之曾大父端叔府君自斥山徙昌陽大父君瑞府君其仲子也又自昌陽徙益都先考禮部公嘗命欽考斥山于氏所出欽對曰按氏族略于氏本周武王子邾叔所封之國在河內邾城子孫以國爲氏去邑爲于後魏時有自東海隨拓拔徙代改爲萬紐于孝文復爲于氏又有淳于姜姓之後唐避憲宗嫌名亦爲于氏此鄭氏之說也然史記文王伐邾書大傳正作于于蓋古諸侯之國非始於邾叔也又夏相時于夷來賓子欲居九夷于夷其一也或卽嶠夷之轉或于國之裔有奔海濱而君長東夷者何其族之蕃而世之衍也斥山之

于祖此爲的先君領之
黃山在城東南八十里山之東頂舊有石砌龍王廟建置無考壁有石碣祇天啓年號依稀可識 國朝康熙五十二年重修靖海衛廩生常元素撰碑字亦多剝蝕略云廟有奇靈康熙間有戲於廟者雷電下擊之人感其靈旱乾水溢有求必應四十七年久旱不雨或以惡祈又以雷擊之斃者四人震驚幾斃者十餘人惟神作威故能作福吾鄉蒙其福而畏其威焚香設奠爰作新廟以示久遠

鐵槎山在城東南一百二十里齊乘鐵槎山東連斥山甚奇秀圖經弗載豈古與斥山爲一與 欽定皇輿全覽鐵槎山相連九頂南瞰大海絕頂大石之上有龍窩龍迹有龍池池水大旱不乾有清涼頂千真洞山東有石名曰上天梯以手拂石方能行年久手印入石寸許東頂有雲光洞卽王真人修煉處東南有雲蒙山山下有水簾洞洞內有二石珠每遇將大風雨珠盪激響如雷土人以卜陰晴焉每歲元旦水退可步至洞門外窺之杳然無際洞門題水簾洞三字大如斗過日則水勢汪洋怒濤洶湧舟人祇遙望之非飛仙不能至也明常康鐵槎山詩羣峯簇翠五雲中眼界橫收六字空山對鼇頭開貝闕水環螺髻現珠宮龍藏古洞風雲合人泛仙槎霧雨濛幻迹三山誰慣見登臨縹渺盼仙

翁

按鐵槎山又名北槎高一千八百十九尺與江南余山相對謂余爲南槎此爲北槎見海防津要表余每赴京返煙臺恒聞船客舟子常言以望見南槎北槎爲將至云

邑人宋啓元遊槎山記

槎山爲大東勝迹距縣城百餘里余髫齡時聞諸父老曰此巨觀也邑士大夫及四方來遊者每杖履過焉余聽其言輒神往及聞此山佳景多踞險絕遂巡不敢前己丑春邑侯尙企望約余同遊時並轡者邑人劉月坡叢遠衷也初夕宿黃山叢丹山邵園三至于聖水于籬瞻于阿輔至靖海常凝社又至次早抵山下從山之東北徑登焉巋嶙困上挺修林懸泉飛灑密蔭沈沈娛心快目此焉其極自麓至顛約十里有奇履一徑曰摩挲佛側身似海畔仰面有蘿叢佛立深崖人攀滋懼轉一徑曰上天梯盤空鳥道巖石接天行者披汗僉曰憊矣猶堅厥骨力循階以升余觸景興思攝衣遲遲至山椒殿宇剝落蒼鼠竄瓦後則石壁峭立藤挂如帷昔有修煉於斯者以鉢剗石成洞不瓦不椽鉢痕四壁內鑄千佛於上名千眞洞尙公詔余與聖水對弈於石屋中此時兩人不宣頗有今古一局之感洞之東南有仙人禪室僅存圯址丹竈石髓玉筍神書杳然不可問徒向邱岑上延佇白雲耳散步而南二三里登清涼頂高居諸峯之首佛閣半間雲根爲牆海水落眼前天光搖空碧煙籠帆影瀾逐鳬飛極目四望不知有人間世也反憩道人方丈內須臾步殿外登古塔遙見西岫上夕暉半落流霞啼鳥客劇飲歡甚余危襟倚塔長嘯高吟山鳴谷應睹塔迹之殘落爲之感廢興焉諸同志告辭余低徊留之不能去月坡攜余寢煉士定所月出峰頭寒砌蟲吟潮聲汨汨如生枕上蟾光明滅之下有翩翩羽衣子持鉢長跪俯仰作態達旦不輟余亦清興飄然置身於崑崙元圃中矣次早將歸尙公語余曰殿西有藏仙洞九龍池覽未竟其奚歸隨衆適洞所見一石路橫僅二三尺上摩青霄下臨無地好事諸少年手引蘿石縮足懸空而過入則四面如

文登縣志

卷一上

山川

十五

堵可藏人百餘居民曰此避兵所也龍池較此洞尤峻險尙公呼之同登余謝不能強之乃登鏡石爲階滑難駐足及巔東西石坡橫二三步敍斜如屋脊狀南北夾岸下視萬似上抵龍池丈餘登者僉倚人臂作梯層巒而上余幾失步阿輔亟掖之乃免入山二日從山之西路旋焉過石穴長一里餘非工非匠結構天然晝晴而陰霪滑不雨前步數里石屏削成澗水潺湲凝社主觴政留飲席地而坐書詩於石輿關人歸過高村計回縣聖水輩強邀之宿大水泊宴阿輔竹月齋會縣署報旌篋之變尙公錯愕猝然而散嗚乎一日之間聚散憂樂有數存焉未可強而致也而況於關天地之運會係生人之遭逢尤其大且遠者乎援筆記之

邑人呂肇齡遊鐵槎山記

乾隆乙未七月二十三日余以事過河口村距鐵槎僅三里許友人劉墨林邀余往遊因與其西席李雲友攜櫓同行行半里茅舍蕭然滿庭竹樹則張道士所居也匆遽不暇流覽徑取道以往由山之東麓捫蘿陟躋層累而上其山石之競起者獨覽者直折者橫裂者凹者凸者辟者墜者形勢奇詭莫可名狀自朝至於日中才得履山腰由此而南山益峻徑益狹峭壁萬仞鐫二石佛於其上名曰摩佛頂下臨深壑不知幾千丈予懼蹈昌黎之號心悸欲還同遊憊憊之遂復整飭行膝與鷹鷲爭綫路並股酸哀凡歷數十石級方敢施施而行行里餘再逾小岡乃見清涼頂頂之下地勢平廠周遭十餘丈玉皇殿在焉殿之陰則千眞洞洞上龍池深莫能測石折而下則捨身臺臺畔古蟄冬夏水恒沸湧當茲秋風颯爽披襟下視海波激盪舳舻銜接繡陌村煙樵歌漁唱莫不迴巧獻技於萬峰之下此殆天作地生以開偉觀者與因浮白狂歌率成七古疥於壁以資來遊者一噓焉

行行東海上計程剛百里鐵槎當我前欲往味所指幸此一二同好人導我前路河之濬入山陰風冷毛髮三里五里披荒榛沓障紆迴飛梁架嵌壁天光通一罅欲上不上意踟躕怕學退之號太華轉思靈境不虛來寶宇巍峨捨身臺登登如聞風靈吼九龍池上縹霧開宛轉磴道一綫度徑壑通明洞天露中有

百千石真人精英常爲衆靈護緣崖更造清涼峰日氣懷懷同霜冬羣山羅列盡低伏似屏似笏難形容
西望二勢北員嶠目力直窮扶桑東吁嗟乎青髻已斑白晝苦短陋彼向平遊尙爲昏嫁緩丈夫生不釣
利更弋名八荒九垓隨所經恨不插羽上霄漢仰首倒捫辰與星劃然長嘯煩襟滌一脫纏繯放羈約共
君伯雅浮酒鱗新詩濡墨題青壁但取快意人莫嗔留此欵側歸鴉迹回路俯瞰大海濤茫茫晚潮初月
白

靖海宋雍登槎山詩

不入此山久重來興欲迷雪殘幽徑滑天遠數峰低落日晴光滿浮雲海色齊扁舟如可泛更在暮潮西

萊陽董樵次宋伊水槎山韻

十載重遊客桃花渡未迷天隨青海闊雁入暮雲低高下山惟石晴陰晝不齊朝來從杖履又過九峰西

董樵雲光洞詩

山水真佳事尋常不易經人來虛勝地吾意結茅亭懸榻低雲樹開窗近斗星修篁風細細留待月明聽
會稽何漣遊鐵槎山詩

峰影與雲連乘槎直上天蒼藤盤絕頂黃葉下飛泉苔蘚龍池畔烟嵐盤氣邊偶然謝塵事來訪洞中仙
邑人于觀貞鐵槎紀聞詩

我聞西頂道半腰天梯陡手扳摩挲佛擦崖蹊越走一蹉千丈崩目閉心跳口最上兩重殿穿井水清瀏
不謂萬仞巔乃見乳竇剖迤北千真洞關始王仙手屈數或逸三幻猜不容扣延闕四丈餘圓石屏遮後
次接九龍池龍窩疑若有其餘諸石怪哆口牽隄醜窟窿與夾板詰曲通戶牖石牢尤最下說石皆非取
極高涼涼頂三石像傳久叩乃應銅鳴不似瓦拊缶每逢夏四旬香會進岱母緣束魚貫上牽挽憊肩肘
竣事下西阪阪險屢盤踞沙滑以趨迅類杵投臼東頂洞雲光仙竈蕪沒帶處一昔煉燒丹成昇謁斗
再南號雲蒙深洞沈海黝舟行或見字水簾題門首元旦水可退石珠驗風吼此皆山別派不列鐵峰九

文登縣志

卷一上

山川

十六

竭來適八月草深蟒蛇蟠否則峭卓錐骨禿松枝朽既莫磬登陟那徧署吾某聊復采此異垂紀比山壽
邑人林鍾岱遊鐵槎山詩

青山欲倒東南傾萬山辟易滄海裂誰架孤槎橫地來九頂撐空色如鐵我行欲到望轉迷羣峰高出中
峯低修從地底穿絕澗更向石窟攀天梯盤迴千轉度平嶺仰視復與蒼溟齊懸崖欲墮不可躡直上惟
有垂藤接伏行兩股幾不支下臨冥洞心膽慄線路直共鷹隼爭捫蘿翻羨猿揉捷忽爾中峯落半天岸
花野草爭鮮妍開士幽居踞其下寶旛高倚天風懸捨身之臺憑危岫絕壑陰森山骨瘦胥靡不登昌黎
號陰風獵獵鳴石竇俯瞰大海起橫波渾沌一氣空宇宙深山日暮遊人多更尋古洞窮巖阿峭壁峻嶒
一萬丈鏗豁石室如蜂窠千真傳神在阿堵龐眉虬目堆青螺夜靜露下侵鷺瓦長空忽見清光瀉翹首
驚異天欲明回顧月在千巖下須臾高出到山腰星斗歷歷皆堪把陡起烏雲青天陰星月黯淡煙雨深
龍池欲上不可得中峰已沒何處尋四顧滉漾翻雪海匆匆躊躇下遙岑西路陡絕挂層嶂古磴盤迂入
煙瘴出入高下不見天卻從石底行石上緣坡小憩雨聲收羣峰競綠遙相向日夜所閱竟不同俯仰頓
覺增惆悵何時攜得驚人之句來共登絕頂排雲開西極咸池東若木淋漓墨潘飛蒼崖丈夫行當逍遙
遊五嶽局促轅下胡爲哉君不見茫
茫碧海接天漢漢使乘槎去復回

管山在城西北三十里巍然獨秀有石洞三一在山麓洞口石齒嶙峋

上尖下廠深邃不可測執炬以往風來炬滅屢然屢息終不敢入中一

洞石門排列類雙扉陰霾晦冥遙望洞口嘯氣成雲若吐納狀近峯之

巔又有一洞圓如環周圍無石亦無草木而滑澤闊平似履坦途時幻作樓臺亭榭奇卉林嵐須臾間變化無端蓋山市也

管山西北數里餘有山曰英武雙峯夾峙突落突起參差羅列有若關然又西北曰天馬山勢如天馬行空不可羈勒其東北小山曰小天層嵐錯疊蔚然深秀

朱紫山在城西北二十五里石髓中流出泥水皆朱紫因以名焉泥製爲器澤潤而堅叩之有聲

邑西北有七松嶺嶺皆種松故名其六嶺巋然而起古松鬱盤狀作龍鱗曰香鑪頂距城二十餘里有臺如鼎足峙立一曰老人臺高丈餘廣倍之有石類羊形俗又呼爲老羊臺臺側有石池口若巨甕水深二

尺許澄清甘冽經年不涸久旱池水溢出環流臺下三五日內必雨農人以之占雨恆驗

元葆頂在城西北四十五里有將軍廟不知建於何時雖漸剝蝕而甃石如砥神像巍然自山徑西下曰珠山亦有古廟又轉而西曰五廬頂鳥道峻嶒人迹罕到舊聞麻姑飛昇實始於此仙迹猶存山之巔霧常不散俗又呼爲霧露頂又西有一山相併傳爲黃巢平後逸酋曾匿此山山多怪異水尤腥穢

密山在城西二十五里東連木渚西接嶺山幽巖秀石多奇形怪狀又有石名怖鴿崖如鳥之凌虛而翔也山之陽有石屹立相向曰石門門之左右曰貉子洞野豬溝南折而東有石洞中闊可容百許人其上牡